



Broj/Broj: 4/1-50-1-9-31/06  
Sarajevo/Sarajevo, 15.3.2006. godine

## **ZAPISNIK**

### **31. sjednice Zajedničke komisije Parlamentarne skupštine BiH za odbrambenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine**

Sjednica je održana 15.3. 2006., u vremenu od 10,00 do 12,30 sati.

Sjednici su prisustvovali članovi Zajedničke komisije:

Boško Šiljegović, Vinko Radovanović, Osman Brka, Adem Huskić, Momčilo Novaković, Branko Zrno, Anto Spajić, Halid Genjac, Vinko Zorić i Mehmed Žilić.

Sjednici nisu prisustvovali: Šefik Džaferović-opravdano, te Mirko Blagojević.

Sjednici su prisustvovali i gosti: brig.gen.Dennis Blease, savjetnik za sigurnost glavnokomandujućeg južnog krila NATO-a, Raffi Gregorian, savjetnik glavnokomandujućeg Štaba NATO-a u BiH, Lejla Dizdarević savjetnik u Štabu NATO-a u BiH, Mensur Delija, savjetnik za vojna pitanja predsjedavajućeg Predsjedništva BiH, Zoran Šainović iz Ministarstva odbrane BiH, Ljiljana Trišić iz Ministarstva sigurnosti BiH; Kristijan Haupt i Tanja Ficdžerald iz OSCE-a; Dragica Hinić, sekretar Zajedničke komisije; Albina Ibrahimagić, volonter u PSBiH. Pri samom kraju, na sjednicu su došli i Jenifer Moor i Darko Ivić iz Ambasade SAD-a u BiH.

Sjednici Zajedničke komisije za odbrambenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine predsjedavao je Boško Šiljegović.

Za sjednicu je predložen

## **DNEVNI RED**

1. Usvajanje Zapisnika 30. sjednice Zajedničke komisije;
2. Razmatranje Sigurnosne politike BiH -informativno  
(Predsjedništvo BiH);
3. Razmatranje prilagođenog Programa saradnje BiH i NATO-a za 2006. godinu (TCP)  
(Ministarstvo odbrane BiH);
4. Informacija Ministarstva odbrane BiH o posjeti stručnog tima NATO-a, broj 07-50-372-6/06,  
od 10.2.2006. (Ministarstvo odbrane BiH);
5. Obavještenje Vijeća ministara BiH o realizaciji zaključaka sa 29. sjednice  
Zajedničke komisije ( Vijeće ministara BiH i Ministarstvo sigurnosti BiH);
6. Tekuća pitanja

Boško Šiljegović informirao je članove Zajedničke komisije da ovoj sjednici prisustvuju izuzetno značajni gosti i to: brig.gen. Dennis Blease, savjetnik za sigurnost glavnokomandujućeg južnog krila NATO-a, Raffi Gregorian, savjetnik glavnokomandujućeg Štaba NATO-a u BiH. Zato je predložio da se predložena tačka 3. dnevnog reda razmatra kao tačka 2. Također je, na molbu predstavnika Ministarstva sigurnosti BiH, predložio da se tačka 5. razmatra u okviru sada nove tačke 3. Sigurnosna politika.

Vinko Zorić predložio je dodatnu podtačku u okviru tačke 6. Tekuća pitanja.

Navedeni prijedlozi, a potom i dnevni red u cjelini, jednoglasno su usvojeni.

#### **Ad.-1. Usvajanje Zapisnika 30. sjednice Zajedničke komisije**

Zapisnik 30. sjednice jednoglasno je usvojen.

#### **Ad.-2. Razmatranje prilagođenog Programa saradnje BiH i NATO-a za 2006. godinu**

##### **(TCP) (Ministarstvo odbrane BiH)**

**Boško Šiljegović istaknuo** je da je Program saradnje BiH i NATO-a za 2006. godinu Ministarstvo odbrane BiH dostavilo 16.2.2006.

**Zoran Šainović** informirao je ukratko članove Zajedničke komisije o ovom dokumentu po pojedinim segmentima, te istaknuo da je Program moguće kontinuirano dograđivati.

**Brig. gen. Dennis Blease** naglasio je da on ne može govoriti o detaljima Programa jer je to zadatak tima gosp. Gregoriana, ali je informirao o saradnji BiH i NATO-a, odnosno Komande Združenih snaga NATO-a u Napulju i dao ukratko svoju radnu biografiju. Istaknuo je da je bio i komandant Štaba NATO-a u Skoplju gdje je bio uključen u reformu odbrane i šireg sigurnosnog sektora. Naglasio je da NATO pruža čitav spektar pomoći mnogim zemljama u ovoj regiji. Zato žele pomoći i BiH u procesu priključenja PFP-u i NATO-u. Na kraju je naglasio da je u BiH načinjen značajan napredak u oblasti reforme odbrane, te istaknuo da će i lično pružiti svaku vrstu pomoći na našem putu ka ispunjenju postavljenih ciljeva.

**Raffi Gregorian** istaknuo je izuzetan značaj Zajedničke komisije u procesu reforme odbrane i njenoj implementaciji. Pri tome je naglasio da je uloga brig.generalata mnogo šira od odbrambene oblasti i obuhvata i više drugih sigurnosnih segmenata. Reforme i u drugim sigurnosnim oblastima u BiH također teku u odgovarajućem pravcu. To je izuzetno značajno jer treba ići u skladu s akcionim planom za članstvo u PFP-u, a zatim i NATO-u. U ovoj aktivnosti BiH će imati pomoć i odgovarajućih stručnjaka Štaba NATO-a u Briselu, koji će doći u našu zemlju i prezentirati iskustva drugih zemalja koje su radile u skladu s akcionim planovima za priključenje ovim savezima. On smatra da je BiH pripremila veoma studiozan i obiman plan za priključenje EU, ali da to nije i slučaj s planom mjera za priključenje PFP-u i NATO-u. U vezi s implementacijom reforme odbrane, istaknuo je da teče relativno dobro, da ima manjih očekivanih problema, ali da se nada da će i oni biti riješeni na zadovoljavajući način. Za ovaj proces zadužen je Stručni tim za tranziciju i on je počeo raditi. Štab NATO-a, zajedno s Ministarstvom odbrane BiH, trenutno radi na izradi sveobuhvatnog petogodišnjeg Plana za članstvo BiH u PFP-u i NATO-u i implementaciji odbrambenog sistema. Ovaj plan zasniva se na pretpostavkama kao što su određeni resursi za njegovu realizaciju. Ako resursi budu zadovoljavajući, to će se prije provesti reforma odbrane i obratno i BiH će prije postati članica PFP-a i NATO-a. Naglasio je i pitanje nove strukture naših Oružanih snaga, te istaknuo da će mogućnost za članstvo u NATO-u zavisiti od naše sposobnosti da održavamo potencijale naših snaga, npr. sredstava naoružanja i dr. Za NATO je važna ta sposobnost a nisu važne brojke. Također, kao preduslov za priključenje ponovio je potpunu saradnju s Tribunalom u Hagu. Ova saradnja ne mora značiti isključivo hapšenje traženih lica, jer sve ukazuje da se i ne nalaze u BiH, već može predstavljati i druge aktivnosti naše zemlje kojima

se jasno pokazuje opredijeljenost za saradnju. U tom smislu pozdravio je nedavno usvajanje Zakona o privremenom zamrzavanju imovine osumnjičenih za ratne zločine u Predstavničkom domu Parlamentarne skupštine BiH, te naglasio neophodnost da ovaj zakon usvoji i Dom naroda. Na osnovu ovakvih aktivnosti, NATO u BiH može obavijestiti Tribunal u Hagu da su preduzete ozbiljne mjere u smislu potpune saradnje BiH, jer još uvijek postoji i mreža pomagača čiji se rad na ovaj način onemogućava. Jedan od značajnih segmenata u procesu priključenja NATO-u su i vojne vježbe koje BiH treba realizirati. Ove vježbe predviđene su za 2009. godinu, ali njihovo planiranje mora biti u ovoj godini, ako se žele realizirati. Naime, ako BiH ove godine ne uđe u planirani raspored vježbi NATO-a, sve aktivnosti onda se pomjeraju za svaku narednu godinu. U vezi s konkretnim Programom saradnje BiH i NATO-a, Ministarstvo odbrane BiH sačinilo ga je u saradnji sa Štabom NATO-a u Briselu i Štabom NATO-a u BiH. Pri tome je NATO dao punu podršku ovom programu, koji predstavlja maksimum saradnje NATO-a sa zemljom koja nije članica PFP-a.

**Osman Brka** istaknuo je da u BiH postoji potpuni konsenzus svih za priključenje Bosne i Hercegovine EU i NATO-u. U tom smislu, građani su pokazali potpunu ozbiljnost jer do sada nije načinjen nijedan incident prema predstavnicima međunarodne zajednice. Zato nije zadovoljan stalnim postavljanjem novih uslova za priključenje BiH navedenim asocijacijama. U našoj zemlji bit će siguran prostor i za strana ulaganja i za sve druge aktivnosti tek kada postanemo članica EU i NATO-a. Apelirao je na prisutne goste da lobiraju za našu zemlju u ovim procesima priključenja.

**Adem Huskić** istaknuo je da će podržati Program saradnje BiH i NATO-a, iako smatra da je ova komisija trebalo da se uključi mnogo ranije i u toku same izrade Programa. Potom je potencirao tačke 7. i 10. iz Programa. Tačka 7. odnosi se na zatvaranje vojnih objekata, uništavanje naoružanja i municije i sl. i treba joj biti posvećena veća pažnja. Tačka 10. tretira pitanje zračne odbrane i zračnih snaga naše zemlje. Huskić smatra da ovo pitanje treba što prije riješiti kako bi znali da li želimo i možemo imati ovaj vid odbrambenog sistema.

**Halid Genjac** osvrnuo se na tačku 6. Programa koja se odnosi na Sigurnosni sporazum, kao izuzetno važan uslov za priključenje PFP-u i dalje. Iz Programa nije vidljivo u kojoj je fazi rješavanje ovog pitanja.

**Zoran Šainović** saglasio se s mišljenjem Adema Huskića kad je riječ o rješavanju pitanja obuhvaćenih tačkom 7. Programa. Naglasio je da će Ministarstvo odbrane BiH dobiti ekspertsku pomoć za njegovo rješavanje, kao i pomoć iz određenih fondova NATO-a. Što se tiče tačke 10. koja tretira pitanje upravljanja zračnim prostorom, naglasio je da će NATO podržati našu odluku o veličini i strukturi Oružanih snaga, ali je na organima BiH da donesu odluku o tome. U vezi s pitanjem Sigurnosnog sporazuma koje je je izuzetno značajno, istaknuo je da BiH to pitanje mora riješiti, pri čemu je prevashodno postavljeno pitanje smještaja državnog organa za sigurnost. Međutim, u ovoj fazi to pitanje nije se moralo naći u ovom programu, ali će posao o ovom pitanju biti intenziviran.

**Raffi Gregorian** naveo je da ovaj program nije detaljan i ne sadrži sva pitanja, jer će svaka njegova tačka biti posebno razrađena. Što se tiče tačke 7. Programa, naglasio je da postoji projekat pod pokroviteljstvom EUFOR-a i UNDP-a koji predviđa sredstva u iznosu od oko 10 mil. dolara za uništavanje eksplozivnih sredstava, oružja i municije. U vezi s tačkom 10., informirao je prisutne da su zamoljeni predstavnici NATO-a iz Brisela da dođu u BiH i pruže pomoć u preuzimanju kontrole neba nižih nivoa a koje još uvijek kontrolira NATO, jer nakon ulaska BiH u PFP, ona dobiva sasvim drugačiju ulogu i poziciju.

**Branko Zrno** istaknuo je da je sasvim jasno da Program nije detaljan te da ga je moguće kontinuirano dograđivati. Potom je predložio da se na strani 8. i svim drugim mjestima gdje je to slučaj, u vezi s aktivnošću koja se odnosi na ovu komisiju, to jasno i naglasi, odnosno da se riječi parlamentarci BiH zamijene riječima predstavnici Zajedničke komisije za odbranu i sigurnost. Ovo je neophodno ispraviti kako se ne bi dešavala prošlogodišnja situacija, kada je bila jasno planirana posjeta članova ove komisije Štabu NATO-a u Briselu, a za put su bili određeni članovi Parlamentarne skupštine BiH koji nemaju apsolutno nikakve veze s oblastima odbrane i sigurnosti.

**1.** Nakon rasprave, članovi Zajedničke komisije jednoglasno su **zaključili** da Program na strani 8., kao i na svim drugim mjestima gdje je predviđeno učešće članova Parlamentarne skupštine BiH,

treba korigirati u smislu preciziranja učešća predstavnika Zajedničke komisije za odbrambenu i sigurnosnu politiku BiH u ovim aktivnostima, koji su u potpunosti involvirani u oblastima odbrane i sigurnosti, i potom ga s ovom izmjenom jednoglasno podržali.

### **Ad.-3. a) Razmatranje Sigurnosne politike BiH -informativno**

#### **(Predsjedništvo BiH)**

**Boško Šiljegović** je, u uvodnom dijelu, informirao da je u skladu s članom 12. o) Zakona o odbrani BiH Predsjedništvo BiH nadležno za usvajanje Sigurnosne politike i Odbrambene politike BiH s ciljem pružanja strateških smjernica u vanjskim poslovima i pitanjima odbrane. Zajednička komisija zato Sigurnosnu politiku razmatra samo informativno. Zatim je otvorio raspravu.

**Mensur Delija** rekao je da je obrađivač ovog dokumenta bilo Ministarstvo sigurnosti BiH, te istaknuo da se potreba za ovim dokumentom ogleda iz samog njegovog sadržaja, koji obrađuje stanje sigurnosti, sigurnosne rizike, kretanja, ostale elemente važne za sigurnosnu politiku itd. Posebno je potencirao ulogu zakonodavnog i izvršnih organa vlasti u oblasti sigurnosne politike, naglasivši da su ovim dokumentom navedene obaveze organa na svim nivoima vlasti.

**Ljiljana Trišić** objasnila je način nastanka ovog dokumenta. On je nastao iz potrebe da se prethodni takav dokument iz 2003. godine dogradi, aktuelizira i poboljša, jer je cijeli sigurnosni sektor od tada do danas doživio brojne promjene. Ovaj dokument sačinila je Međuresorna radna grupa Vijeća ministara BiH, u kojoj su bili predstavnici određenog broja ministarstava na nivou pomoćnika ministara, i uz pomoć OSCE-a. Dokument koji je sačinila navedena radna grupa bez primjedbi je prošao proceduru pred Vijećem ministara BiH i Predsjedništvom BiH, s tim što se i ovaj dokument može kontinuirano dograđivati.

**Momčilo Novaković** istaknuo je da je ovaj dokument dobio neposredno prije održavanja sjednice i nije se mogao upoznati s njegovim sadržajem. Zanimalo ga je da li će ovaj dokument ići na raspravu pred domove Parlamentarne skupštine BiH, s obzirom da je izuzetno značajan za BiH te da bi o njemu Predsjedništvo BiH trebalo informirati oba doma Parlamentarne skupštine BiH. Kako je dobio negativan odgovor na svoje pitanje, predložio je da Zajednička komisija usvoji zaključak kojim od Predsjedništva BiH traži da o Sigurnosnoj politici BiH u što kraćem roku informira oba doma Parlamentarne skupštine BiH.

**Adem Huskić** saglasan je s mišljenjem Momčila Novakovića. Naglasio je da je obaveza Predsjedništva BiH da, u skladu s tačkom n) člana 18. Zakona o odbrani BiH, informira Parlamentarnu skupštinu BiH o strateškim sigurnosnim i odbrambenim pitanjima.

Nakon rasprave, Zajednička komisija konstatirala je da ovaj dokument obrađuje strateška i sigurnosna pitanja značajna za BiH, te da bi o njemu Predsjedništvo BiH trebalo informirati oba doma Parlamentarne skupštine BiH, a u skladu s tačkom n) člana 18. Zakona o odbrani BiH. Zato je Zajednička komisija jednoglasno usvojila **zaključak** kojim od Predsjedništva BiH traži da o Sigurnosnoj politici BiH u što kraćem roku informira oba doma Parlamentarne skupštine BiH, u skladu s tačkom n) člana 18. Zakona o odbrani BiH.

### **b) Obavještenje Vijeća ministara BiH o realizaciji zaključaka s 29. sjednice Zajedničke komisije ( Vijeće ministara BiH i Ministarstvo sigurnosti BiH)**

**Boško Šiljegović** dao je uvodne napomene po obavještenju Vijeća ministara BiH i Ministarstva sigurnosti BiH o realizaciji zaključaka s 29. sjednice Zajedničke komisije. Ovim zaključcima, koje je Zajednička komisija usvojila nakon sastanka sa Zajedničkom sigurnosno-obavještajnom komisijom za nadzor nad radom OSABiH i u razgovoru s predstavnicima Glavnog štaba NATO-a

iz Brisela o Sigurnosnom sporazumu i uslovima koje BiH mora ispuniti da bi bila potpisnica navedenog sporazuma, zahtijevano je sljedeće:

-Od Vijeća ministara BiH i Međuresorne grupe, u kontekstu prethodno usvojenih zaključaka zajedničkih komisija Parlamentarne skupštine BiH, od 8.12.2005., tražilo se da u što kraćem roku dostave kompletnu informaciju o realizaciji aktivnosti neophodnih za potpisivanje Sigurnosnog sporazuma;

-Od Vijeća ministara BiH i Predsjedništva BiH zahtijevalo se da osnuju državni sigurnosni organ u skladu s članom 75. Zakona o zaštiti tajnih podataka, a u skladu s rokovima utvrđenim u Nacrtu sigurnosnog sporazuma, te da dostave informaciju o stepenu realizacije ove aktivnosti.

Svojim obavještenjem Vijeće ministara BiH i Ministarstvo sigurnosti BiH informiraju članove Komisije o učinjenim aktivnostima u međuvremenu, kao što je izrada Odluke o uspostavljanju centralnog registra sa službenom evidencijom o izdatim dozvolama za sva lica koja imaju pravo pristupa tajnim podacima, te odluke o određivanju državnog sigurnosnog organa za provođenje Zakona o zaštiti tajnih podataka i izrada podzakonskih akata. Pravilnikom o unutrašnjoj organizaciji Ministarstvo sigurnosti BiH dobilo je novu organizacionu jedinicu - Sektor za zaštitu tajnih podataka - koji treba obavljati poslove državnog sigurnosnog organa u skladu s navedenim zakonom.

**Ljiljana Trišić** posebno je kao ključni problem naglasila problem uredskog prostora za novoosnovani Sektor za zaštitu tajnih podataka. Problem uredskog prostora inače postoji i u okviru Ministarstva sigurnosti BiH, kao i svih drugih ministarstava. Kao jednu od mogućnosti rješavanja ovog pitanja, navela je smještaj u dio prostorija Ministarstva odbrane BiH nakon njihovog preseljenja.

Nakon rasprave, Zajednička komisija konstatirala je da je većina zaključaka realizirana. Zbog značaja navedenog državnog sigurnosnog organa za predstojeći proces priključenja Bosne i Hercegovine EU, te PFP-u i NATO-u, Zajednička komisija usvojila je sljedeći **zaključak**: „Od Vijeća ministara BiH zahtijeva se da se, u situaciji kada će doći do preseljenja dijela Ministarstva odbrane BiH, u što kraćem vremenu na adekvatan način riješi pitanje smještaja Sektora za zaštitu tajnih podataka, koji je sastavni dio Ministarstva sigurnosti BiH.

#### **Ad.-4. Informacija Ministarstva odbrane BiH o posjeti stručnog tima NATO-a, broj 07-50-372-6/06, od 10.2.2006. godine (Ministarstvo odbrane BiH)**

**Boško Šiljegović** informirao je da je Ministarstvo odbrane BiH dostavilo je Zajedničkoj komisiji Informaciju o obavljenoj posjeti stručnog tima NATO-a ovom ministarstvu, 6. februara 2006. godine, u kojoj su navedene teme razgovora. Ove teme obrađuju pitanje procesa tranzicije i provođenja reforme odbrane, posebno naglašavajući pitanje pravovremenog donošenja odluke o veličini, strukturi i razmještanju Oružanih snaga, popunjavanja osobljem, donošenja adekvatnog budžeta za odbranu, rada Tima za tranziciju, sigurnosnih izazova i druga pitanja čije je ispunjenje neophodno u procesu priključenja BiH PFP-u i NATO-u. Na kraju ove informacije naveden je zaključak koji, prema mišljenju Ministarstva odbrane BiH, dotiče suštinska pitanja procesa reforme odbrane i uslova za priključenje PFP-u i NATO-u. Zajednička komisija ovu informaciju razmatra u okviru svoje redovne djelatnosti parlamentarnog nadzora nad radom izvršnih organa vlasti, odnosno cjelokupnim procesom tranzicije odbrambenog sistema BiH.

Nakon kraće rasprave, Zajednička komisija primila je Informaciju k znanju.

## **Ad.-6. Tekuća pitanja**

### **a) Informacija o razgovoru Zajedničke komisije s delegacijom Parlamentarne skupštine NATO-a 1. marta 2006. godine;**

Članovi Zajedničke komisije primili su Informaciju k znanju.

### **b) Informacija o sastanku Zajedničke komisije s direktorom Odjela za sigurnosnu saradnju Misije OSCE-a u BiH i vojnim savjetnikom visokog predstavnika u BiH gosp. Kristijanom Milotatom, 9.3.2006.**

Članovi Zajedničke komisije primili su Informaciju k znanju.

### **c) Izvještaj o učešću na Trećoj ministarskoj konferenciji o temi : „Iskustva stečena uspostavljanjem sistema granične sigurnosti“ od 23. do 25.2.2006.**

Članovi Zajedničke komisije jednoglasno su usvojili Izvještaj o Trećoj ministarskoj konferenciji, kojoj su prisustvovali Mehmed Žilić i Željko Grubešić.

### **d) Informacija o posjeti Parlamentu i odbrambeno-bezbjednosnim strukturama Litvanije**

Članovi Zajedničke komisije informirani su da bi navedena posjeta, prema najnovijim informacijama, trebalo da bude realizirana u periodu od 15. do 17. maja 2006.

### **e) Posjeta jedinici za deminiranje OSBiH u Iraku**

Boško Šiljegović informirao je da je Ministarstvo odbane BiH 3. marta ove godine zatražilo da im odmah, istog dana, dostavimo prijedlog tri člana Zajedničke komisije koji bi se priključila predstavnicima ovog ministarstva prilikom posjete navedenoj jedinici u Iraku, od 27. do 29. marta tekuće godine, a radi pasoške i druge provjere.

Kandidirana su tri člana i to: Boško Šiljegović, Branko Zrno i Adem Huskić. Nakon kraće rasprave članovi Zajedničke komisije potvrdili su ovu kandidaturu i predložili kolegijima da donesu zvaničnu odluku.

### **f) Izbor predstavnika Zajedničke komisije za prisustvo Konferenciji o temi „NATO i EU-buduće uloge u Jugoistočnoj Evropi“, koja će biti održana od 2. do 4. maja 2006. u Berlinu.**

Nakon kraće rasprave članovi Zajedničke komisije predložili su kolegijima da donesu zvaničnu odluku o upućivanju Halida Genjca na predloženi put.

Nakon dodatne rasprave na samom kraju ove sjednice, odlučeno je da se, pored izabranog Halida Genjca, na ovaj put ide i Vinko Zorić.

### **g) Centar za sigurnosne studije BiH s centrima iz Beograda i Zagreba organizira seminar o temi: „Evropska sigurnosna i odbrambena politika (ESDP) od 26. do 29. marta 2006. godine.**

Boško Šiljegović istaknuo je da Zajednička komisija treba odrediti dva člana za prisustvo navedenom seminaru. Prema našim informacijama, ovom seminaru prisustvovat će Fatima Leho iz Komisije za evropske integracije. Zato su, kao predstavnici Zajedničke komisije za prisustvo ovom seminaru, kolegijima predloženi Momčilo Novaković i Anto Spajić.

**h) Posjeta civilnih i vojnih zvaničnika BiH SAD-u, od 13. do 20. maja 2006.**

Kako su za navedenu posjetu SAD-u iz Ministarstva odbrane BiH već zvanično predložena četiri kandidata, dva Bošnjaka i dva Hrvata, Zajednička komisija trebalo bi da predloži jednog kandidata srpske nacionalnosti. Nakon kraće rasprave Zajednička komisija predložila je Kolegiju Doma naroda da donese odluku o upućivanju na navedeni službeni put Vinka Radovanovića.

**i) Okrugli sto o „Konceptu obuke u oblasti sigurnosne politike“, 24.marta 2006. , u Sarajevu, u organizaciji Odjela za sigurnosnu saradnju OSCE -a.**

Kako je trebalo izabrati dva predstavnika Zajedničke komisije za prisustvo navedenom okruglom stolu, izabrani su Boško Šiljegović i Mehmed Žilić.

**j) Seminar u Tirani od 10 do 12. aprila 2006. o temi „Angažman parlamentaraca Jugoistočne Evrope u borbi protiv organiziranog kriminala“**

Organizator Seminara je Pakt stabilnosti JE koji snosi troškove prijevoza i smještaja. Organizator je na ovaj seminar zvanično pozvao Boška Šiljegovića, Branka Zrnu i Željka Grubešića. Nakon kraće rasprave, članovi Zajedničke komisije predložili su Kolegiju Doma naroda da donese odluku o upućivanju predloženih kandidata na pomenuti službeni put.

**k) Informacija o slučaju „Abazović“**

Boško Šiljegović informirao je Zajedničku komisiju da je, u skladu sa zaključkom ove komisije, Ministarstvo sigurnosti BiH dostavilo 9.3.2006. Informaciju o slučaju Abazović. Predložio je da ovu informaciju Zajednička komisija razmatra na narednoj sjednici kada članovi budu upoznati sa njenim sadržajem. Navedeni prijedlog jednoglasno je prihvaćen.

**l) Obaveza informiranja Zajedničke komisije od procesu tranzicije u Ministarstvu odbrane BiH**

**Boško Šiljegović** istaknuo je da je, u skladu s članom 61. Zakona o odbrani BiH i zaključkom Zajedničke komisije, ministar odbrane BiH obavezan jednom mjesečno, a po potrebi i češće, na osnovu informacija Stručnog tima za provođenje tranzicije, izvještavati Zajedničku komisiju o procesu tranzicije. Komisija ukazuje na ovu zakonsku obavezu Stručnog tima za tranziciju i ministra odbrane i zahtijeva njeno dosljedno poštivanje.

U raspravi koja je uslijedila Zajednička komisija konstatala je i da je u međuvremenu osnovana Radna grupa za koordinaciju reforme odbrane, u kojoj su predstavnici određenih ministarstava, te da bi i o njenom radu trebali imati određene informacije. U skladu s navedenim, Zajednička komisija usvojila je sljedeći **zaključak:**

„Od ministra odbrane BiH i Stručnog tima za tranziciju zahtijeva se da postupaju u skladu s članom 61. Zakona o odbrani BiH i ranije usvojenom zaključku Zajedničke komisije, te jednom mjesečno informiraju ovo radno tijelo o tranzicionom procesu. Kako je u međuvremenu osnovana i Radna grupa za koordinaciju reforme odbrane, ova informacija treba sadržati i informaciju o radu te radne grupe.“

**m)** Članovi Zajedničke komisije podsjećeni su na činjenicu da je za 23.3.2006., u vremenu od 9,30 do 10,15 sati, predviđen sastanak s Komitetom za odnose sa javnošću Skupštine Zapadnoevropske unije. Zato bi u najvećem broju trebalo da se odazovu ovom pozivu.

**n) Vinko Zorić** je potom postavio dva pitanja:

- prvo se odnosilo na upućivanje predstavnika Zajedničke komisije na službeni put u Berlin, koji je razmatran u okviru podtačke e). U dopisu organizatora navedeno je

da će snositi troškove učešća za dva, a ne jednog parlamentarca. Zato ga je zanimalo zašto nisu predložena dva člana Komisije.

Boško Šiljegović istaknuo je da je vjerovatno došlo do greške prilikom pravljenja pregleda za ovu sjednicu, te je predložio da, pored već izabranog Halida Genjca, Kolegij donese oduku da na ovaj put ide i Vinko Zorić. Navedeni prijedlog prihvaćen je jednoglasno.

- drugo pitanje odnosilo se na iskazivanje nepovjerenja radu rukovodstva Zajedničke komisije. Kao razlog za stavljanje na glasanje pitanja povjerenja rukovodstvu, Vinko Zorić istaknuo je samovolju u radu.

Nakon iznesenog prijedloga otvorena je rasprava u kojoj je učestvovala većina članova Zajedničke komisije.

**Momčilo Novaković** rekao je da ovo pitanje zaslužuje ozbiljniju raspravu i detaljno obrazloženje razloga. Spreman je izjasniti se o povjerenju rukovodstvu, ali samo ako će se sada glasati s ciljem izbora stalnog a ne privremenog rukovodstva Komisije.

**Osman Brka** naglasio je kako smatra da se takva odluka ne bi mogla donijeti na ovoj već na narednoj sjednici.

**Halid Genjac** istaknuo je da se pitanje izbora stalnog rukovodstva može riješiti tek stupanjem na snagu novih poslovnika oba doma. Za njega samovolja, kao razlog za smjenu koji je ponudio Vinko Zorić, nije prihvatljiv s obzirom da je do sada uvijek Zajednička komisija potvrđivala i donosila konačne odluke o svim pitanjima, pa i onim kada je njeno rukovodstvo moralo nekada hitno djelovati. Zato smatra da pomenuti razlog ne stoji.

**Anto Spajić** smatra da bi trebalo dati bolje i opširnije obrazloženje ako se želi donijeti takva odluka, te bi možda bilo bolje odlučivanje odgoditi za narednu sjednicu.

**Vinko Radovanović** je u potpunosti bio saglasan s mišljenjem Halida Genjca dodajući da smatra da ne postoji nikakva samovolja rukovodstva, već, naprotiv, uvijek jako dobra priprema svake sjednice.

**Adem Huskić** istaknuo je da nije u početku shvatao ozbiljno prijedlog Vinka Zorića. Naglasio je da smatra da ne stoji navedeni razlog za smjenu. Naprotiv, smatra da je rad ovog rukovodstva izuzetno dobar i da mu je često zadovoljstvo prisustvovati radu Zajedničke komisije baš zbog njenog rukovodstva.

Nakon rasprave, članovi Zajedničke komisije glasali su o prijedlogu Vinka Zorića za smjenu rukovodstva ove komisije.

Za smjenu rukovodstva glasala su tri člana, dok je sedam članova Komisije bilo protiv, uključujući i potrebnu većinu članova po domovima, čime navedeni prijedlog nije usvojen.

Zapisnik sačinila  
Dragica Hinić

Privremeni predsjedavajući  
Boško Šiljegović



